

入室魔境

入室靜極之時本身魂魄三部八景臟腑諸神變化作妖或見紅蛇來或見西王母或見仙人玉女作樂萬端或見長幡寶蓋天書來迎或見龍車鳳輦千乘萬騎或天魔化作父母妻子來試或邪神變爲奇形異狀來引已上魔境不可具陳切勿理他一心守定其魔自消忽然踴躍自歌自舞口發狂言題詩作賦或談玄說妙或喜笑悲哀是乃三尸之所使也若不禁止前工盡廢或見老翁乘鹿來呼或見兩女相攜來語或一日身體倦怠胸膈刺脹吐血數盃不得爲慮乃是自幼用力勞傷心血也吐出此血宿疾普消或兩脇如錐刺六腑如裂帛或二便出惡臭異物九竅出穢膿血乃胎毒惡結待他去完換盡陰滓然後變爲異香以作仙體或眼出毒難開以人乳點洗用十四歲童女每日以舌舐之且元神易出女亦得仙或身體蒸熱迷悶不省百節疾痛如碎周身大汗如雨不得爲怪乃真超脫也或三田補滿外腎時舉不散卽便以左手中指點住陰蹻穴右手拿捉玉莖外腎提上關元緊撮谷道豎起脊骨送上泥丸二目上視頂門以眼旋轉三十六次得陽散方止此最上一乘至道心傳乃萬世不易之仙學也學者勉之哉

道藏輯要

至道心傳

三

危集六
X111